

**CONVENIO DE COLABORACIÓN ENTRE A CONSELLERÍA DE EDUCACIÓN, CIENCIA,
UNIVERSIDADES E FORMACIÓN PROFESIONAL E A UNIVERSIDADE DE VIGO PARA
COMPLETAR AS AXUDAS AO PERSOAL INVESTIGADOR DO PROGRAMA COFUND
DESTINADO NO CENTRO DE INVESTIGACIÓN EN NANOMATERIAIS E BIOMEDICINA
(CINBIO)**

Santiago de Compostela, [data/sinatura dixital]

COMPARECEN

Dunha parte, Román Rodríguez González, conselleiro de Educación, Ciencia, Universidades e Formación Profesional, nomeado mediante o Decreto 44/2024, do 14 de abril (DOG núm. 73 do 14 de abril), que actúa en virtude das facultades atribuídas no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

Doutra parte, Manuel Joaquín Reigosa Roger, reitor magnífico da Universidade de Vigo (UVIGO), nomeado mediante o Decreto 110/2022, do 9 de xuño (DOG núm. 117 do 20 de xuño de 2022), en representación desta, e en virtude das facultades que lle confire o artigo 50.1 da Lei orgánica 2/2023, do 22 de marzo, do sistema universitario, e o artigo 29 do Decreto 13/2019, do 24 de xaneiro, polo que se aproban os seus Estatutos (DOG núm. 38 do 22 de febreiro).

Interven en nome e representación das súas respectivas institucións, recoñecéndose mutua e reciprocamente a capacidade para obrigarse, mediante o presente convenio, para o que previamente

EXPOÑEN

PRIMEIRO.- A Consellería de Educación, Ciencia, Universidades e Formación Profesional (en adiante, a Consellería) é o departamento da Xunta de Galicia ao que lle corresponden as competencias e funcións en materia de planificación, regulación e administración do ensino regrado en toda a súa extensión, niveis, graos, modalidades e especialidades, así como a coordinación do sistema universitario, tal e como se lle atribúen no Estatuto de Autonomía de Galicia, na Lei 6/2013, do Sistema universitario de Galicia, e se especifica no Decreto 138/2024, do 20 de maio (DOG núm. 101 do 27 de maio de 2024), polo que se establece a estrutura orgánica da Consellería de Educación, Ciencia, Universidades e Formación Profesional.

A Consellería considera prioritario fomentar a mobilidade, a cooperación e a internacionalización das persoas investigadoras, co obxectivo, entre outros, de incrementar a formación do persoal investigador de Galicia no estranxeiro e impulsar a internacionalización da investigación galega, co fin de mellorar a súa cantidade e calidade.

SEGUNDO.- A Secretaría Xeral de Universidades é o órgano superior da Administración xeral da Comunidade Autónoma de Galicia para a ordenación, planificación e execución das competencias en materia de universidades e ensinanzas universitarias correspondentes á Consellería, de acordo coas competencias que lle atribúe o Decreto 138/2024, do 20 de maio, de estrutura orgánica da Consellería. Entre as súas competencias correspóndelle a promoción e xestión eficiente e integradora dos recursos e capacidades de investigación do Sistema universitario de Galicia (SUG) para a súa posta en valor no marco do sistema de innovación e, particularmente, a promoción da coordinación das universidades galegas no establecemento de programas, infraestruturas e actuacións en materia de investigación.

TERCEIRO.- As universidades que integran o SUG, os organismos públicos de investigación e as outras entidades do Sistema de I+D+i galego, realizan actividades de investigación e desenvolvemento científico e tecnolóxico que as configuran como unha das principais axentes xeradoras de coñecemento en Galicia.

O impulso da actividade investigadora é un obxectivo irrenunciable para calquera sociedade e, por isto, é necesario fomentar unha maior integración entre os centros de investigación e os sectores produtivos, incidir na cultura de calidade e eficacia na utilización de infraestruturas e de capital humano que permitan unha mellora significativa na totalidade dos sectores produtivos e, a súa vez, a potenciación dunha universidade galega de calidade e demais entidades que conforman o I+D+i galego.

CUARTO.- A Universidade de Vigo (UVIGO), entidade que forma parte do sector público institucional, é unha das entidades integrantes do Sistema universitario de Galicia (SUG) que, xunto coa misión docente, realiza actividades de investigación e desenvolvemento científico e tecnolóxico e de transferencia do coñecemento, o que a configura como unha das principais axentes xeradoras de coñecemento en Galicia.

O Centro de Investigación en Nanomateriais e Biomedicina (CINBIO) é un centro de investigación amparado pola UVIGO que se constituíu en 2009 e cuxo obxectivo principal é dar resposta non só ás necesidades do sector biomédico e biotecnolóxico, senón tamén da sociedade en xeral. Dende 2016 consolidouse como centro de investigación de excelencia do sistema universitario galego. Dende entón, o CINBIO centra a súa actividade na xeración de coñecemento a través dunha investigación de alto impacto realizando actividades de I+D+i e desenvolvendo a súa aplicación.

O CINBIO é unha aposta da Universidade de Vigo pola investigación para o desenvolvemento dos nanomateriais e a biomedicina, a través da excelencia, a colaboración e a súa proximidade ás necesidades da sociedade.

Entre os seus obxectivos principais está transferir e desenvolver I+D+i na fronteira do coñecemento, optimizando os seus recursos a través da consolidación de sinerxías para a obtención de resultados innovadores e aplicables.

O CINBIO amosa un claro compromiso co contorno socioeconómico, poñendo en valor o seu traballo arredor das necesidades da poboación e apostando por multiplicar o retorno á sociedade grazas á xeración de coñecemento científico, a formación de grandes investigadores e investigadoras e a redución da brecha entre ciencia e sociedade, asegurando así o futuro da ciencia.

A Consellería de Educación, Universidade e Formación Profesional, a través da Resolución do 13 de decembro de 2019 (DOG núm. 7, de 13 de xaneiro de 2020) pola que se conceden as axudas da Orde do 19 de setembro de 2019 (DOG núm. 182, do 25 de setembro de 2019) pola que se establecen as bases reguladoras e se convocan as axudas para a acreditación, estruturación e mellora de centros de investigación do SUG, recoñeceu ao CINBIO como «Centro de Investigación de Galicia» para o período 2019-2022. Posteriormente, a Consellería de Educación, Ciencia, Universidades e Formación Profesional, a través da Resolución do 19 de abril de 2024 (DOG núm. 85, de 30 de abril de 2024) pola que se conceden as axudas da Orde do 24 de outubro de 2023 (DOG núm. 85, do 30 de abril de 2024) pola que se establecen as bases reguladoras e se convocan as axudas para a estrutura, a mellora e o apoio aos centros de investigación do SUG, renovou o recoñecemento ao CINBIO como «Centro con acreditación en excelencia» e recoñecemento como membros da Rede CIGUS para o período 2024-2027.

QUINTO.- A Lei orgánica 2/2023, do 22 de marzo, do sistema universitario (LOSU) establece, no seu artigo 28, que as comunidades autónomas e as universidades cooperarán para fomentar a atracción de talento internacional ao sistema universitario e promoverán medidas que faciliten a incorporación do persoal docente e investigador internacional.

Así mesmo, a atracción de talento a Galicia tamén supón unha mellora da calidade das actividades de investigación que se desenvolven. É moi relevante que as universidades, as empresas e os centros de investigación de Galicia sexan polos de atracción para o persoal investigador posdoutoral de todo o mundo que fagan a investigación avanzada e competitiva.

SEXTO.- A captación, formación e retención de talento supón unha área estratéxica do Goberno galego co fin de atraer e desenvolver os recursos humanos especialmente capacitados para os procesos de xeración de coñecemento, definindo unha carreira profesional que posibilita a formación e fomento da excelencia científica no sistema galego de I+D+i.

A captación do mellor talento científico e innovador é esencial para fortalecer o Sistema público de investigación galego, por iso a Consellería promove o Programa de captación de talento, incentivando e apoiando a presentación aos programas máis competitivos das mellores candidaturas sen que o seu éxito supoña unha carga orzamentaria para a universidade, centro de investigación universitario ou grupo. Tendo ademais en conta que o éxito nestes programas, máis aló do retorno científico e económico que a persoa investigadora produza, supón un indicador de calidade para o organismo no que se incorpore e para o conxunto do sistema galego de I+D+i, e que así se recolle no Plan de financiamento do Sistema universitario de Galicia 2022-2026.

A Estratexia de Especialización Intelixente (RIS3) de Galicia 2021-2027, aprobado por acordo do Consello da Xunta de Galicia do 8 de abril de 2022, define o marco das políticas de investigación e innovación na Comunidade Autónoma para este período. Como instrumento de planificación operativa para a súa implementación entre 2025 e 2027, o Consello da Xunta aprobou o 3 de febreiro de 2025 o Plan galego de investigación e innovación 2025-2027.

O presente convenio enmárcase na RIS3 de Galicia 2021-2027, aliñándose cos tres retos e coas tres prioridades. Así mesmo, contribúe ao obxectivo estratéxico 4, integrándose polo tanto no programa Persoas e Talento do RIS3 e no programa Talento do Plan galego de investigación e innovación 2025-2027.

SÉTIMO.- O esquema MSCA-COFUND é unha convocatoria do programa cadro de investigación da Unión Europea (EU) que ten o obxectivo de promover a excelencia en programas de captación de talento. Estes programas poden ter dimensión rexional, nacional ou internacional, dependendo do seu alcance, da institución solicitante e da ambición da proposta presentada.

A principal característica dos programas COFUND é que deben garantir a excelencia científica, e ademais, ofrecer ao persoal investigador contratado unha formación integral. Os proxectos poden ter unha duración de 3 a 5 anos e os períodos de contratación do persoal captado poden variar. Estes programas deben garantir que se cumpre coas tres dimensións establecidas pola Comisión Europea (CE) no programa MSCA: a internacionalidade, a intersectorialidade e a interdisciplinabilidade.

A convocatoria MSCA-COFUND ofrece cofinanciamento na que a Comisión Europea (CE) achega aproximadamente a metade dos custos. COFUND é un mecanismo de cofinanciación que facilita o apoio financeiro adicional a programas de atracción de talento para a investigación rexional, nacional e internacional.

COFUND cofinancia programas, tanto de incorporación de investigadores predoutorais como posdoutorais. Búscase a excelencia e a calidade da formación e desenvolvemento da carreira investigadora dentro das entidades beneficiarias.

O programa divídese en dous modalidades:

- Programas doutorais (Doctoral Programmes): financiamento de actividades de formación investigadora, habilidades e competencias no marco dun programa de doutorado.
- Programas Posdoutorais (Postdoctoral Programmes): financiamento de proxectos individuais de capacitación en investigación avanzada e desenvolvemento profesional para investigadores posdoutorais.

OITAVO.- Baixo estas premisas, o programa NANO4TALENT é a proposta COFUND do CINBIO. O programa ten unha duración prevista de 60 meses e prevese contratar a 5 investigadoras/es posdoutorais, en dúas convocatorias abertas, transparentes e anunciadas internacionalmente. Os contratos terán unha duración de 24 meses e será requisito que o persoal captado se involucre a dous grupos de investigación diferentes de dúas áreas centrais asociadas ao CINBIO (Nanomateriais e Biomedicina).

Os/as bolseiros/as definirán libremente un proxecto de investigación interdisciplinar, que se axuste ás súas necesidades e intereses individuais, involucrando a dous grupos

de investigación diferentes das dúas áreas principais (Nanomateriais e Biomedicina) e explorando novas colaboracións e sinerxías entre o persoal investigador de CINBIO.

As persoas candidatas deben cumprir a regra de mobilidade das MSCA, é dicir, non residir máis de 12 meses no país que realiza o contrato nos 3 anos anteriores á formalización deste contrato. Ademais, deben garantir co cumprimento das tres dimensións establecidas pola CE no programa de traballo das MSCA: a internacionalidade, realización de estadías noutros Estados durante o seu contrato, a intersectorialidade, estadías en entidades alleas ao sector académico, e interdisciplinariedade.

De acordo co exposto anteriormente, as partes acordan subscribir o presente convenio, que se rexerá polas seguintes

CLÁUSULAS

PRIMEIRA. **Obxecto do convenio**

Este convenio ten por obxecto establecer a colaboración entre a Consellería de Educación, Ciencia, Universidades e Formación Profesional e a Universidade de Vigo (UVIGO), para completar as axudas destinadas ás persoas beneficiarias das estadías incluídas no programa MSCA-COFUND de formación do persoal investigador en réxime de contrato posdoutoral e os gastos asociados á súa contratación. Están destinadas a persoas investigadoras da UVIGO, interesadas en completar a súa formación cunha estadía no estranxeiro.

SEGUNDA.- **Compromisos das partes**

De acordo coa lexislación vixente, as partes comprométense:

A Consellería comprométese a colaborar no financiamento do gasto realizado pola UVIGO para impulsar as actuacións derivadas das convocatorias de contratación no



marco do programa NANO4TALENT, proposta COFUND do CINBIO, no que se prevé a contratación de 5 investigadores/as posdoutorais adscritos ao CINBIO.

A UVIGO destinará as axudas a cofinanciar os gastos asociados á contratación do persoal posdoutoral seleccionado por un importe de 362.040 € e coa distribución que de seguido se indica:

	2025	2026	2027	2028	2029	TOTAL
Achega XUNTA	10.000 €	105.612 €	105.612 €	70.408 €	70.408 €	362.040 €

Ao abeiro deste convenio cofinanciaranse os custos asociados á contratación do persoal posdoutoral no marco do programa NANO4TALENT, proposta COFUND do CINBIO durante a vixencia deste convenio, incluíndo complemento para cubrir os gastos asociados á súa contratación, tales como, as súas estadías noutros centros ou universidades, os honorarios do persoal da comisión avaliadora vinculada á súa contratación, gastos de xestión e investigación, inscrición en congresos e cursos de formación e persoal de difusión e comunicación.

A UVIGO comprométese a someterse ás actuacións de comprobación a efectuar polo órgano concedente, así como a calquera outra actuación, sexa de comprobación ou control financeiro, que poidan realizar os órganos de control competentes, tanto autonómicos como estatais ou comunitarios, aportando canta información lle sexa requirida no exercicio das actuacións anteriores.

Así mesmo, a UVIGO comprométese a cumprir calquera outra obriga establecida no artigo 40 do Regulamento da *Lei 9/2007, de subvencións de Galicia*, en relación co artigo 11 da citada Lei.

A UVIGO como beneficiaria do programa NANO4TALENT, proposta COFUND do CINBIO, contratará laboralmente ás persoas seleccionadas e porá ao seu dispor as instalacións e medios materiais e formativos necesarios para a realización axeitada do seu traballo.

A universidade asume o custo das súas respectivas contratacións no que exceda das axudas concedidas, así como posibles incrementos retributivos (ou de cota

empresarial da seguridade social) ou calquera outra incidencia. Tamén están obrigadas a comunicar as baixas, renuncias, interrupcións e demais incidencias dos contratos cofinanciados.

A universidade deberá facilitar cantos datos resulten necesarios para a valoración do instrumento no marco da avaliación da RIS3 Galicia ou doutros mecanismos, en particular as enquisas do INE, relacionados coa medición da I+D+i.

Os datos asignados aos citados instrumentos de avaliación deberán estar consignados á Comunidade Autónoma de Galicia. No marco de seguimento e avaliación da RIS3 Galicia, desenvolverase un seguimento específico das axudas concedidas. Este seguimento estará baseado na recompilación de información acerca dos resultados económicos e científico-técnicos obtidos polas entidades beneficiarias. A tales efectos, durante a execución e ao finalizar a axuda (expost), os beneficiarios deberán proporcionar información relativa a unha serie de indicadores, entre os que se incluírán indicadores xerais e específicos de I+D+i.

De conformidade co artigo 31.7 da Lei 9/2007, do 13 de xuño, de subvencións de Galicia, e co establecido no artigo 11.a) do regulamento da Lei de subvencións de Galicia, a obriga da UVIGO de presentar a certificación do cumprimento de obrigas coa Administración pública da comunidade autónoma, coa Administración do Estado e coa Seguridade Social poderase substituír por unha declaración responsable de estar ao día no cumprimento das obrigas tributarias ou fronte á seguridade social e de non ter pendente de pagamento ningunha outra débeda coa Administración.

TERCEIRA. Financiamento

A dotación da Consellería para este convenio procede do Plan galego de financiamento universitario para o período 2022-2026, por un importe total de trescentos sesenta e dous mil corenta euros (362.040,00 euros) con cargo á aplicación orzamentaria 07.02.561B.744.0 (código de proxecto 2016 00129) dos orzamentos xerais da Xunta de Galicia para os exercicios 2025 e 2026. As anualidades do 2027, 2028 e 2029 integraranse no novo plan de financiamento, sempre que así o permitan as dispoñibilidades orzamentarias.



O programa NANO4TALENT ten unha duración prevista de 60 meses e está previsto contratar nel a 5 investigadoras/es posdoutorais, en dúas convocatorias abertas, transparentes e anunciadas internacionalmente. Os contratos terán unha duración de 24 meses e será requisito que o persoal captado se involucre a dous grupos de investigación diferentes de dúas áreas centrais asociadas ao CINBIO (Nanomateriais e Biomedicina).

Así mesmo, na colaboración no financiamento da Xunta, incluíranse os gastos asociados á súa contratación, tales como, as súas estadías noutros centros ou universidades, os honorarios do persoal da comisión avaliadora vinculada á súa contratación, gastos de xestión e investigación, inscrición en congresos e cursos de formación e persoal de difusión e comunicación do programa NANO4TALENT, proposta COFUND do CINBIO.

A achega da Xunta por anualidades será a seguinte:

	2025	2026	2027	2028	2029	TOTAL
Achega XUNTA	10.000 €	105.612 €	105.612 €	70.408 €	70.408 €	362.040 €

Por mor das características das bases destas convocatorias e da posibilidade de desenvolver estadías en calquera das anualidades da axuda, poderán coincidir nunha mesma anualidade un número maior de persoas investigadoras de varias convocatorias que a prevista inicialmente. Por este motivo, de acordo co artigo 26.3 do Decreto 11/2009 , do 8 de xaneiro, polo que se aproba o regulamento da *Lei 9/2007, do 13 de xuño, de subvencións de Galicia*, prevese a posibilidade de modificar a distribución das contías indicadas no cadro anterior, supeditándoa unicamente a informe favorable da comisión de seguimento establecida na cláusula sexta e tramitación do correspondente reaxuste de anualidades no expediente de gasto.

Esta cantidade de 362.040,00 € trátase dun importe certo e corresponde ao financiamento das actividades recollidas neste convenio, estando ao disposto no artigo 21.2 do regulamento da Lei 9/2007, do 13 de xuño, de subvencións de Galicia, aprobado polo Decreto 11/2009, do 8 de xaneiro.

A axuda é compatible con outras concedidas para o mesmo fin, pero, en ningún caso, o importe da subvención achegada pola Consellería poderá ser de tal contía que, illada ou en concorrencia con outras subvencións, supere o custo da actividade subvencionada, tal como se establece no artigo 17.3 da *Lei 9/2007, do 13 de xuño, de subvencións de Galicia*. De ser o caso, deberá reintegrarse o financiamento público polo importe que supere o custo total e real da actividade, segundo o establecido no artigo 21.2 do regulamento da *Lei 9/2007, do 8 de xaneiro, de subvencións de Galicia*, aprobado polo Decreto 11/2009, do 13 de xuño (DOG núm. 20, do 29 de xaneiro).

CUARTA. Xustificación e pagamento

Para os pagamentos correspondentes, a UVIGO achegará antes do 1 de decembro de cada ano de vixencia do convenio:

a) Unha certificación expedida polo órgano que teña atribuídas as facultades de control que faga referencia á toma de razón en contabilidade, na que conste o cumprimento da finalidade do presente convenio e que os fondos foron destinados a este fin, así como o detalle da realización dos gastos e dos pagamentos. Singularmente, debe acreditarse a contratación nos postos de traballo obxecto da axuda COFUND e a achega efectiva da Unión Europea para o período xustificado. Os pagamentos correspondentes ás nóminas e seguridade social dos meses de novembro e decembro de cada anualidade poderán presentarse como xustificante de gasto do ano seguinte. No caso da última anualidade 2029, dado que o dito prazo debe cumprir co establecido no artigo 45.5 do Decreto 11/2009, do 8 de xaneiro, polo que se aproba o Regulamento da Lei de subvencións, o prazo de xustificación das nóminas de novembro e decembro deberá realizarse dentro da anualidade 2029. Deberá entregarse folla de cálculo e pdf asinado con exacta correspondencia entre ambos os dous documentos.

b) Unha memoria explicativa das actividades desenvolvidas con cargo aos fondos recibidos, asinada polo/a director/a do CINBIO, centro de destino dos posdoutorais contratados .



c) Unha declaración complementaria do conxunto das axudas solicitadas, tanto as aprobadas ou concedidas como as pendentes de resolución, para este fin, das distintas administracións públicas.

d) Un certificado asinado pola universidade no que se acredite no período do pagamento a vinculación e permanencia no posto do persoal posdoutoral referido.

e) De conformidade co artigo 31.7 da *Lei 9/2007, do 13 de xuño, de subvencións de Galicia*, e co establecido no artigo 11.a) do regulamento da Lei de subvencións de Galicia, a obriga da UVIGO de presentar a certificación do cumprimento de obrigas coa Administración pública da Comunidade Autónoma, coa Administración do Estado e coa Seguridade Social poderase substituír, por unha declaración responsable de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración.

QUINTA.- Responsabilidade

A subscrición do presente convenio non supón relación laboral contractual ou de calquera outro tipo entre o persoal investigador que desenvolva as actividades e a Consellería, de tal xeito que non se lle pode esixir ningunha responsabilidade, indirecta nin subsidiaria, polos actos ou feitos acontecidos no seu desenvolvemento.

SEXTA.- Comisión de seguimento

Para velar polo cumprimento do estipulado, crearase unha comisión paritaria de seguimento da execución do convenio, que se reunirá a petición dunha das partes, constituída do seguinte xeito:

- Pola Consellería, dous membros da Secretaría Xeral de Universidades, dos que un/unha actuará como presidente/a.
- Dous vicerreitores/as da Universidade de Vigo, ou persoas en quen deleguen.

Actuará como secretario/a da comisión o/a xefe/a de servizo de Planificación e Estruturação da Investigación, axustándose o réxime xurídico desta ao establecido nos preceptos básicos da *Lei 40/2015, do 1 de outubro, de réxime xurídico do sector*



público, e na Lei 16/2010, do 17 de decembro, de organización e funcionamento da administración xeral e do sector público autonómico de Galicia.

A dita comisión actuará como órgano de vixilancia, seguimento e control do establecido neste convenio, promovendo propostas de solucións aos posibles conflitos. Así mesmo, emitirá informe sobre a posibilidade de redistribuír as contías indicadas na cláusula terceira. Non obstante, a Consellería ostentará as prerrogativas de interpretación, modificación, resolución e nulidade, propias dos negocios xurídicos administrativos de acordo coa Lei de contratos do sector público. En todo caso, aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida, serán resoltas pola Consellería.

SÉTIMA.- Modificación do convenio

Consonte co disposto no artigo 17.4 da Lei 9/2007, toda alteración das condicións tidas en conta para a concesión da subvención e, en todo caso, a obtención concorrente doutras achegas fora dos casos permitidos nas presentes cláusulas, poderá dar lugar á modificación do convenio.

Calquera modificación que as partes acorden realizar sobre o presente convenio deberase formalizar por escrito. Así mesmo, e de conformidade co disposto no artigo 31.4 da Lei 14/2013, do 26 de decembro, de racionalización do sector público autonómico, os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sostenibilidade financeira. Ditas modificacións terán por obxecto a redución do volume das obrigas ou a ampliación do seu prazo de execución.

OITAVA.- Vixencia do convenio

O presente convenio entrará en vigor coa sinatura dixital da última persoa asinante, sen prexuízo de que poidan atender accións realizadas desde o 1 de xaneiro de 2025, e terá vixencia ata o 31 de decembro de 2029.

NOVENA.- Extinción do convenio

Non obstante o establecido na cláusula anterior, este convenio poderá extinguirse por acordo mutuo e voluntario das partes, por renuncia dalgunha ou por denuncia deste por incumprimento dalgunha delas, o que se comunicará fidedignamente, logo de audiencia desta e con, polo menos, un mes de antelación. Así mesmo, o convenio extinguirase polas causas previstas no artigo 51 da *Lei 40/2015, do 1 de outubro, de réxime xurídico do sector público*. En calquera destes casos, así como no caso de incumprimento das obrigacións e compromisos asumidos por cada unha das partes, procederase á revogación da axuda, así coma ao reintegro total ou parcial das cantidades percibidas e a esixencia de xuros de mora nos casos previstos no artigo 33 da *Lei 9/2007, do 13 de xuño, de subvencións de Galicia*.

De acordo co artigo 14.1.n da Lei 9/2007, os criterios de gradación dos posibles incumprimentos para determinar a cantidade que se vai minorar ou reintegrar serán os seguintes:

- a) O incumprimento total dos fins para os que se concede a subvención, da realización dos gastos subvencionables ou da obriga de xustificación dará lugar á perda do dereito ao cobro ou, no seu caso, ao reintegro da axudas percibida.
- b) Calquera outro incumprimento considerárase incumprimento parcial dos fins para os que se concedeu a axuda, da realización dos gastos subvencionables ou da obriga de xustificación, e dará lugar á perda do dereito ao cobro ou, no seu caso, ao reintegro na porcentaxe correspondente á inversión non efectuada ou non xustificada.

DÉCIMA.- Natureza do convenio

De acordo co establecido no artigo 36 do Decreto 11/2009, do 8 de xaneiro, polo que se aproba o regulamento da *Lei 9/2007, do 13 de xuño, de subvencións de Galicia*, este convenio ten un interese público, xa que ao contribuír a sufragar gastos asociados ás actuacións das convocatorias de contratación derivada do programa NANO4TALENT, proposta COFUND do CiNBIO, no que se prevé a contratación de 5 investigadores/as

posdoutorais adscritos ao CINBIO, estase a potenciar unhas carreiras profesionais independentes, reforzando a excelencia, o dinamismo e a creatividade da investigación, superando o problema estrutural que supón o desperdicio do talento investigador e o retraso da aparición da próxima xeración de persoal director de investigacións independentes.

No ámbito do SUG o persoal posdoutoral ao que se vincula a axuda é o único con subvencións do programa NANO4TALENT - COFUND no momento de sinatura deste contrato, con proxectos vinculados ao SUG, por iso non é necesario promover a concorrência competitiva da subvención. Neste punto, téñase en conta que é un programa da Unión Europea e pasan un rigoroso proceso de avaliación.

O presente convenio de colaboración ten a natureza dos previstos no artigo 47.2.a) da *Lei 40/2015, de 1 de outubro, do réxime xurídico do sector público*, rexéndose aos seus efectos polo establecido nas cláusulas deste e, no seu defecto, pola normativa xeral en materia de contratos das administracións públicas e polo establecido na *Lei 9/2007, de 13 de xuño, de subvencións de Galicia* e no seu Regulamento, aprobado polo Decreto 11/2009, do 8 de xaneiro.

UNDÉCIMA.- Publicidade e transparencia

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da *Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006*, a UVIGO consente expresamente para que a Administración autonómica inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como ás sancións impostas.

A reserva que puidera facer a UVIGO no sentido de non autorizar a obtención dos datos ou a publicidade destes nos rexistros, que en todo caso terá que expresarse, poderá dar lugar á exclusión do proceso de participación para obter a axuda ou á revogación do acto de outorgamento.

As partes asinantes deste convenio manifestan o seu consentimento para que os datos persoais que constan no mesmo, así como o resto das especificacións contidas no mesmo, poidan ser publicados no Portal de Transparencia e Goberno Aberto.

De acordo co disposto no *Marco sobre axudas estatais de investigación e desenvolvemento e innovación* (DOUE C 414/1, do 28.10.2022), non se aplica o establecido no artigo 107.1 do Tratado de Funcionamento da Unión Europea e, polo tanto, non terá a condición de axudas de estado as axudas previstas neste convenio por outorgarse a organismos de investigación para actividades non económicas. Non obstante, a UVIGO deberá garantir que as actividades derivadas deste convenio se axustan ás normas procedimentais e materiais vixentes no momento da concesión da axuda, debendo informar á Consellería por medio da comisión de seguimento.

A subvención estará sometida á función interventora e de control financeiro exercida pola Intervención Xeral da Comunidade Autónoma, nos termos que establece a *Lei 9/2007, do 13 de xuño, de subvencións de Galicia*. Así mesmo, estarán sometidas ás actuacións de comprobación e previstas na lexislación do Tribunal de Contas e do Consello de Contas no exercicio das súas funcións de fiscalización e control do destino das subvencións.

En aplicación dos principios recollidos na *Lei 19/2013, do 9 de decembro, de transparencia, acceso á información pública e bo goberno* e de acordo co indicado na actual redacción do artigo 20 da *Lei 38/2003, do 17 de novembro, xeral de subvencións*, a información correspondente ao presente convenio publicárase na Base de Datos Nacional de Subvencións. Ademais, o convenio incluírase nun rexistro de convenios público e accesible e referenciarase no Diario Oficial de Galicia, todo iso de conformidade co establecido no artigo 15 da *Lei 1/2016, do 18 de xaneiro, de transparencia e bo goberno*.

De acordo co estipulado no artigo 53 da *Lei 40/2015, de 1 de outubro, de réxime xurídico do sector público*, este convenio deberá ser remitido ao Consello de Contas nos termos que no mesmo se establecen.

DUODÉCIMA.- Protección de datos

As partes asinantes comprométense a cumprir, en todo momento, as disposicións contidas na normativa básica estatal e autonómica que xustifica a lexitimidade do tratamento dos datos persoais e dereitos dixitais.

Na aplicación deste convenio respectaranse cantas esixencias establece o Regulamento UE 679/2016 xeral de protección de datos e a Lei orgánica 3/2018, do 5 de decembro (BOE 06/12/2018), de protección de datos persoais e garantía dos dereitos dixitais, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos persoais e dos dereitos dixitais, e a súa protección fronte a alteracións, perdas, tratamentos ou accesos non autorizados.

Serán de aplicación todos os dereitos e obrigas derivados da normativa aplicable en materia de protección de datos e garantía dos dereitos dixitais.

Este convenio obriga ás partes que o asinan ao seu cumprimento, e ambas se someten ao acordado en todas as estipulacións.

DÉCIMO TERCEIRA.- Resolución de controversias

O presente convenio réxese en canto a súa interpretación e desenvolvemento polo ordenamento xurídico administrativo, con expresa submisión das partes á xurisdición contencioso-administrativa, nos termos que se establecen na *Lei 40/2015, de 1 de outubro, de réxime xurídico do sector público*.

Lido por todas as partes, por si mesmas, e como proba de conformidade co expresado no presente convenio, asínano dixitalmente

Román Rodríguez González
Conselleiro de Educación, Ciencia, Universidades e Formación Profesional

Manuel Joaquín Reigosa Roger
Reitor da Universidade de Vigo (UVIGO)